

Morning Dogri (NSD) National News Bulletin 10-03-2025

आकाशवाणी

- कल दुबई च भारत नै न्यूजीलैंड गी 4 विकटें कन्नै हराइयै आईसीसी चैंपियन्स ट्राफी पर रिकार्ड त्रीह बारी कब्जा कीता, रोहित शर्मा गी प्लेयर ऑफ द मैच ते न्यूजीलैंड दे रचिन रविन्द्रा गी टूर्नामेंट दा बेहतररीन खडारी घोषत कीता। राष्ट्रपति, प्रधानमंत्री होरें इस एतिहासक जित्त दा भारतीय क्रिकेट टीम गी ममारकबाद दिक्ती ऐ।
- संसद दे बजट इजलास दा दुआ चरण अज्जै थमां शुरू होआ'रदा ऐ।
- राष्ट्रपति द्रौपदी मुर्मू होर अज्जै थमां हरियाणा, चंडीगढ़ ते पंजाब दे दौरे पर जा'रदियां न।
- मध्यप्रदेश दे मुख्मन्त्री मोहन यादव अज्ज माधव नैशनल पार्क च 9में टाइगर रिजर्व दा उद्घाटन करगन।
- भारत ते यूरोपीय संघ बश्कार मुक्त बपार समझौते बारे 10में गेड़ दी गल्लबात अज्जै थमां शुरू होआ'रदी ऐ।
- साबका बैंक अधिकारी मार्क कार्नी कनाडा दे अगले प्रधानमंत्री होंगन।

<><><><><><>

ICC India Win

जंदी रातीं दुबई अंतर्राष्ट्री क्रिकेट स्टेडियम च खेड्ढ गेदे आईसीसी चैंपियंस ट्राफी दे फाईनल च भारत नै न्यूजीलैंड गी 4 विकटें कन्नै हराइयै इक नमां इतिहास रचदे होई रिकार्ड त्रीऽ बारी चैंपियंस ट्राफी दा खिताब अपने नांऽ करी लैता ऐ। 252 द्रौड़ें दे लक्ष्य दा पिच्छा करदे होई भारत नै इक ओवर बाकी रौह्दे जित्त हासल करी लैती। भारत दी जित्त च कप्तान ते सलामी बल्लेबाज रोहित शर्मा ते शुभमन गिल बश्कार होई दी 105 रन्जें दी सांझेदारी न अहम भूमिका निभाई। एह्दे अलावा अक्षर पटेल, श्रेयस अय्यर ते हार्दिक पांड्या नै बी इस जित्त च अहम भूमिका निभाई। रोहित शर्मा होरें'गी प्लेयर ऑफ द मैच ते न्यूजीलैंड दे रचिन रविन्द्रा गी प्लेयर ऑफ द टूर्नामेंट घोषत कीता गेआ।

<><><><><><>

Prez – PM Congrats

राष्ट्रपति द्रौपदी मुर्मू ते प्रधानमंत्री नरेन्द्र मोदी होरें आईसीसी चैंपियन्स ट्राफी जित्तने पर भारतीय क्रिकेट टीम गी ममारकबाद दित्ती ऐ। राष्ट्रपति मुर्मू होरें सोशल मीडिया पर इक सनेए व आखेआ जे भारत त्रै बारी चैंपियन्स ट्राफी जित्तने आली इक मात्र टीम बनी गई ऐ ते एह इतिहास रचने लेई टीम दे खडारी, प्रबंधक ते सैहयोगी स्टाफ सब्बै ममारकबाद दे हक्कदार न। प्रधानमंत्री होरें इस जित्त गी गैर ममूली करार दिंदे होई टीम दी सराहना कीती ते आखेआ जे साढ़ी टीम नै पूरी प्रतियोगिता च शानदार खेड्ड दा मुजायरा कीता। गृहमंत्री अमित शाह, बीजेपी अध्यक्ष जे.पी.नड्डा, कांग्रेस अध्यक्ष मल्लिकार्जुन खरगे ते फिल्मी दुनिया दिएं केइएं हस्तिएं बी इस कामयाबी पर भारतीय टीम गी ममारकबाद दित्ती ऐ।

<><><><><><>

PCB

दुबई च कल रातीं चैंपियन्स ट्राफी दे फाइनल च अपना इक बी नुमायंदा नेई भेजने पर पाकिस्तान क्रिकेट बोर्ड पीसीबी दी यख्त नुख्ताचीनी कीती जा'रदी ऐ। भारत दे खताब जित्तने दे मौके पर अंतर्राष्ट्रीय क्रिकेट काउंसल दे अध्यक्ष जय शाह, भारतीय क्रिकेट कंट्रोल बोर्ड दे अध्यक्ष रोजर बिन्नी, बोर्ड दे सचिव देवजीत ते न्यूजीलैंड क्रिकेट दे निदेशक रोजर टूसे खडारिएं गी बधाई देने लेई मैच पर पुज्जे। मीडिया रिपोर्ट मूजब पाकिस्तान क्रिकेट बोर्ड दे अध्यक्ष मोहसिन नकवी इस्लामाबाद च जरूरी कम्मं होने दा हवाला देइयै दुबई नेई हे गे। पाकिस्तान दे साबका क्रिकेट शोयब अख्तर होरें सोशल मीडिया पर आखेआ जे पाकिस्तान दी तरफा कोई नुमायंदा उत्थें नेई भेजेआ जाना इक माड़ी गल्ल ऐ, जिसी ओह समझी नेइ सका'रदे न। पाकिस्तान क्रिकेट बोर्ड दा आखना ऐ जे उंदे मुख्ख संचालन अफसर ते चैंपियन्स ट्राफी दे टूरनामेंट निदेशक सुमेद अहमद कल दुबई च गै हे पर उनेंगी कुसै नै मंच पर औने दा साददा नेइं दित्ता।

<><><><><><>

Budget

संसद दे बजट इजलास दा दूआ गेड़ अज्जै थमां शुरू होग। एह इजलास 4 अप्रैल तोड़ी चलोग। खजाना मंत्री निर्मला सीतारमण होर अज्ज मणिपुर दा बजट पेश करगंन।

पिछले म्हीने मणिपुर दे मुख्खमंत्री एन.बीरेन सिंह हुंदे स्तीफे दे मगरा राज्य च राष्ट्रपति शासन लाई दित्ता गेआ हा। साढ़े संवाददाता नै दस्सेआ जे इजलास दे दरान ब'रे 2025-26 लेई अनदान ते सरबंधत विनियोग विधेयक पर चर्चा ते मतदान होग।

<><><><><><>

President

राष्ट्रपति द्रौपदी मुर्मू होर अज्जै थमां हरियाणा, चंडीगढ़ ते पंजाब दे त्रऊं दिनें दे दौरे पर रौंहगन। अपने दौरे दे पैहले साढ़े राष्ट्रपति होर हिसार च गुरू जम्मेश्वर विज्ञान ते प्रौद्यागिकी विश्वविद्यालय दे दीक्षांत समारोह च हिस्सा लैंगन। एहदे मगरा राष्ट्रपति होर ब्रह्मकुमारीएं दे स्वर्ण जयंति समारोह दे मौके पर राज्य सतह दे अभियान "समग्र कल्याण लेई माध्यात्मिक शिक्षा" दा शुभारंभ करगंन। राष्ट्रपति होर कल बठिंडा च पंजाब केन्द्री विश्वविद्यालय ते एम्स दे दीक्षांत समारोह च हिस्सा लैंगन। संजा'लै ओह मोहाली च पंजाब सरकार आस्सेआ आयोजित नागरिक अभिनंदन समारोह च शामिल होंगन। बुधवार गी राष्ट्रपति होर चंडीगढ़ च पंजाब विश्वविद्यालय दे दीक्षांत समारोह च शामिल होंगन।

<><><><><><>

PM-Maurithus Visit

प्रधानमंत्री नरेन्द्र मोदी होर मॉरीशस दे अपने दऊं दिनें दे सरकारी दौरे दरान उत्थुआ दे प्रधानमंत्री हुंदे कन्नै बक्ख-बक्ख परियोजनाएं दा उद्घाटन करगंन। इनें परियोजनाएं च सिविल सेवा कालेज ते क्षेत्रीय सेहत केन्द्र शामिल न। एह परियोजना भारत दी मदद कन्नै बनाई गेदियां न। आकाशवाणी समाचार कन्ने गल्लबात करदे होई भारत दे उच्चायुक्त अनुराग श्रीवास्तव होरें आखेआ जे भारत ते मॉरीशस दे दरम्यान निग्गर, गतिशील ते दबक्खी सरबंध न ते प्रधानमंत्री मोदी हुंदा दौरा दौनें मुल्खें दे बश्कार निग्गर सरबंधें दी तसदीक करोग ते इस सरबंधे गी नमीं उंचाइएं पर लेई जाने च मदद करोग।

<><><><><><>

PM Tiger

मध्य प्रदेश दे मुख्खमंत्री मोहन यादव होर अज्ज इक बाघ ते इक बाघिन गी छोड़ियै राज्य दे 9में टाइगर रिजर्व माधव राष्ट्री उद्यान दा उद्घाटन करगंन। मुख्खमंत्री होर पार्क दे अंदर 13 किलोमीटर लम्मी पत्थर दी सुरक्षा दीवार दा बी उद्घाटन करगंन।

मुख्यमंत्री यादव होरें राज्य गी 9मां बाघ अमयारण्य तोहफे च देने लेई प्रधानमंत्री नरेन्द्र मोदी हुंदा आभार व्यक्त कीता। एह देश दा 68मां संरक्षत पार्क होग। मुख्यमंत्री होरें आखेआ जे शिवपुरी जिले च स्थित एह बाघ अमयारण्य वन्यजीव संरक्षण ते सैलसफा गी बढ़ावा देग जेहड़ा के वन्यजीव संरक्षण दे खेत्तर च मध्य प्रदेश दी इक बड्डी उपलब्धि ऐ। राश्ट्री उद्यान च इस बेल्लै 5 होर बाघें गी छोड़ने दे कन्नै गै इस अमयारण्य च उंदी गिनतरी 7 होई जाग।

<><><><><><>

India-ECI

भारत ते 27 देशें दा समूह यूरोपीय संघ अज्ज ब्रुसेल्स च प्रस्तावित मुक्त बपार समझौते लेई 10में गेड़ दी गल्लबात शुरू करगंन। इस बैठक च बकाया रौहदे मुद्दें दा हल्ल तुप्पी कड्डने पर मुख्य तौरा पर ध्यान दितता जाग तां जे बरे दे खीरै तगर इस समझौते गी खीरी रूप दित्ता जाई सकै। बपार ते आर्थिक सुरक्षा पर यूरोपीय संघ दे कमीशनर माशेस सेफकोविक हुंदी हालिया दौरे दरान दौनें पक्खें संतुलित ते रिवायती एंगे नै लाहकारी बपार समझौते दे जतनें च तेजी आहन्नने दे तौर तरीके पर सलाह सूत्र कीता हा। प्रधानमंत्री नरेन्द्र मोदी ते यूरोपीय आयोग दियां अध्यक्ष एर्सुला वॉन डेर लेयन होरें पिछले म्हीने ट्रंप प्रशासन दी मते टैक्स लाने दी शैकाएं दे चलदे इस बरे तगर भारत-ई.यू.मुक्त बपार समझौते गी पूरा करी लैपे पर सैहमति जताई ही।

<><><><><><>

Canada Next PM

सैंट्रल बैंकर मार्क कार्नी कनाडा दे अगले प्रधानमंत्री होंगन। सत्ताधारी लिबरल पार्टी नै उनेंगी अपना नेता चुनेआ ऐ। 59 बरें उे कार्नी प्रधानमंत्री जस्टिन ट्रूडो दी थाहर लेंगन। ट्रूडो होरें जनवरी च अपने स्तीफे दी घोषणा कीती ही। कार्नी होरें पैहले बैंक ऑफ कनाडा दे गवर्नर दे रूपै च कम्म कीता ते फही 2013 च बैंक ऑफ इंग्लैंड दी कयादत करने आले पैहले गैर नागरिक बने।

<><><><><><>

Iran Nuclear

ईरान नै आखेआ ऐ जे ओह अमरीका कन्नै गल्लबात करने बारे बचार करग पर जेकर चर्चा ओहदे परमाणु कार्यक्रम दे सैन्यकरण मामले तगर महदूद रवै तां। एह जानकारी ईरान दे संयुक्त राश्ट्र मिशन नै इक सोशल मीडिया पोस्ट च दित्ती ऐ।

एहदे शाह पैहले ईरान दे सब्बने शा बड ुडे नेता अयातुल्ला अली खामे नेइ होरें अमरीका कन्नै गल्लबात गी एह आकखदे होई खारज करी दित्ता हा जे ईरान दे मिसाइल कार्यक्रम ते ओहूदे इलाकें पर होने आले असर पर रोक लाने पर ध्यान केन्द्रि करगंन।

<><><><><><>

India-Kyrgyzsyan

भारत ते किर्गिस्तान दे सांझे विशेष बल अभ्यास दा 12मां गेड अज्ज किर्गिस्तान च शुरू होआ करदा ऐ, जिसी खंजर-12 नपां दित्ता गेआ ऐ। 14एं दिनें दा एह अभ्यास 2 मार्च तोड़ी चलोग। इस अभ्यास दा मकसद शेहरी ते पहाड़ी इलाकें च आतंकवाद रोध ीते विशेष बलें दे संचालन ते उंदिएं कारवाइएं दे तौर तरीके, विधिएं ते तज्जुबें गी इक दुए कन्नै सांझा करना ऐ। रक्षा मंत्रालय नै जानकारी दित्ती ऐ जे इस अभ्यास दरान स्नाइपिंग, पहाड़ी इलाकें च कारवाइएं गी अंजाम देने ते कठन भगोलिक हालात च ठेहरने ते कारवाइयां करने दे बेह्तरिन तौर तरीके बारे इक दुए गी जानकार करना ते सांझे तौरा पर एहदा अभ्यास करना ऐ। एहदे नै दौनें मुखें गी अंतराश्ट्रीय आतंकवाद दिएं समस्याएं कन्ने निबडऱ्ठने च सखाल होग। खंजर अभ्यास इक सलाना सिखलाई कार्यक्रम ऐ जेहदी शुरूआत 2011 च होई ही।

<><><><><><>